

INUIT ATAQATIGIIT INATSISARTUNI



UKA 2015/106
25. november 2015
Peter Olsen

**Kalaallisut oqaatsitta qanoq tusagassiutini nukittorsarneqarsinnaanerannik
qaffassarneqarsinnaanerannillu apeqquteqaat aallaavigalugu oqallisissiaq.**

(Inatsisartunut ilaasorta q Mimi Karlsen, Inuit Ataqatigiit)

Inatsisartunut ilaasortaatitap Mimi Karlsenip Inuit Ataqatigiineersup oqaluuserisassanngortitaanut qulaani pineqartumut matumuuna Inuit Ataqatigiit sinnerlugit imatut oqaaseqaateqassaavut.

Siullermik Mimi Karlsenimut qujanaq, uunga siunnersuummut nuannersumut, soqutiginarturnullu.

Mimi Karlsenip siunnersuuteqarnermigut tusagassiutitsigut oqaatsitta eqqortumik atorneqarnissaata qanoq pingaaruteqartiginera ersersinniarpa oqariartuutiginiarpaalusooq.

Kialluunniit silaminik silaqanngitsup immaqa kisimi taamaallaat Mimi Karlsenip oqariartuutaa paatsoorsinnaavara assortorsinnaavaalu.

Mimi Karlsen oqariartuutaa ersarippoq, tassalu qulakkeertariaqaripput tusagassiutini oqaatsitta eqqartortumik atorneqarsinnaanissaat, tamannalu immaqa aqutissiuunneqarsinnaasoq soorlu; Islandi-mi Radio RUV-mi oqaatsinik immikkut ittumik ilisimasalinnik atorfinitsitsoqartarsimanerattut ittumik iliuuseqarsinnaasuugutta.

Mimi Karlsen isumaqatigisinnaavara tusagassiutini oqaatsitta eqqortumik atorneqartariaqarnerannik taamatullu qulakkeerneqartariaqarnera pillugu oqaaseqarnera. Kisianni immaqa oqaatsinik immikkut ittumik ilisimasalinnik atorfinitsisariaqarnissamik piunasaqarnissamut tunngatillugu immaqa tamanna eqqartorluarneqaqqissinnaavoq.

Isuma q immi ajoquteqanngilaq, taamaallaalli apeqqutaaginnersarpoq tamanna qanoq atuutsinneqassanersoq? Allaffissornerulernermik kinguneqaannassava? Aningaasartuuteqaannarnerulernermik kinguneqassava?

Apeqqutit akissutissarsiusallugit soqutiginarsinnaasut. Akissutissarmita ilaa qanoq ittuussagaluarpaa? Paaserusunnarsinnaagaluarpoq.

Inuit Ataqatigiinniit paasisaqarfigissallugu soqutigaarput, aamma akissutissarsiniarnissaanut peqataasinnaavugut.

Kingumut ukiorpaalunnet utilaarutta, taava takussavarput malugissavarpullu naqitatigut nutaaarsiassani aammalu radiokkut aallakaatitsinermi allaat oqaatsitta eqqorpallaanngitsumik atorneqaleriartorsimanerat ersarilluinnalersimavoq.

Qularnanngitsumik qallunaatut allaqqaarneqarsimasarput. Taassumalu kingorna uagutsituumut nutserneqartarlutik. Nutsernerlutarujussuusalutillu.

Nunaqqatigiit akornanniit allaat oqalligisigineqartalerluni; Aasiit nutaaarsiassarsuaq nutsigaannarsuaq, aasiit nutsernerlutarujussuarlu oqqarlunnerujussuarlu.

Tamatta tamanna nalugunannginnatsigu uteqattaarissanngilanga, taamaattoq nuannaaruti-galugu oqaatigissavara qujanartumik maluginiagassaammat, takuneqarsinnaallunilu tusaane-qarsinnaalermat ullumikkut tusagassiutitsigut oqaatsitta atorneqarnerat ajunngitsumik siuariartortoqartoq. Ajunngitsumik ingerlasoqartoq malugineqarsinnaavoq, tamanna nuannaarutissaavoq, piffissarlu manna iluatsillugu tusagassiutit tamaasa, minitaqarnanga, nersualaarusuppakkallu taamatut angusaqarluarsimanerat siuariarsimanerallu pissutigalugu.

Tassa kisianni qanorluunniit sumulluunniit saatikkaluarutsigu, allaqqunneqarsinnaanngilaq qaqugumulluunniit nakkutigiuartariaqassagatsigu ilumut ajunngitsumik ingerlasoqarnerasoq, paarilluartariaqarparpullu ajunngitsumik ingerlanissaa, paarilluanngikkaannimi atorluanngik-kaannilu imaaliallaannarluni sequmeriaannaavoq.

Taamaattumik soqutiginarpoq eqqartussallutigu tusagassiutit, ilumut oqaatsinut immikkut ittumik ilisimasalimmik atorfinititsisalernissaannik piumasaqaateqartalissanersugut.

Tusagassiutit inuiaqagitigiinni pingaaruteqarluinnartutut maligassiuusutullu inissisimasuunerat tunngavigalugu; tusagassiutit tassammata inuppassuarnit tusarnaarneqarlutillu malinna-affigineqarluartartut. Taamaattumillu taamatut inissimanermikkut, inuiaqatigiinnut annertuumik akisussaaffeqalersimasut, oqaatsitta eqqortumik atorneqarnissaat pillugu maligassiuusunissamik politikkeqarnissaminnillu annertuumik akisussaaffeqarlutik.

Taamaattumik Inuit Ataqatigiinniit Mimi Karlsenimut qujalluta, apeqquteqaat aallaavigalugu tusagassiutini oqaatsitta atorneqarnerat pillugu oqallinnissatsinnut siunnersuutaat tigulluarlugu, akuersaarlugu tapersorsorlugulu oqallilluarnissassinnik kissaappassi.

Inatsisartut tamarmiusut oqaaseqaatissaannut IA akuersilluni taasisaaq.

Qujanaq